

四庫全書

史部

欽定四庫全書

史部

江南通志卷一百七十三至五

詳校官給事中_臣丁雲錦

檢討_臣德生覆勘

總校官編修_臣王燕緒

校對官助教_臣卞維吉

臚錄監生_臣汪存璜

欽定四庫全書

江南通志卷一百七十三

人物志

流寓

二 安徽寧池太廬鳳潁八府和廣六三州

安慶府

漢橋玄字公祖梁國睢陽人舉孝廉補洛陽左尉桓
帝末鮮卑及高句驪叛四府舉玄為度遼將軍元
至鎮休兵養士督諸將討擊皆破散在職三年邊

境安靜靈帝初徵入為河南尹建寧三年遷司空
轉司徒光和元年遷太尉以疾罷立謙儉下士子
弟親宗無在大官者家無居業當時稱之後避地
於潛卒葬彰法山

晉王祥字休徵臨沂人祥性至孝早喪親繼母朱不
慈祥愈恭謹漢末避亂扶母攜弟隱居大雷三十
餘年時傳其孝行屢辟固辭弟覽勸之乃應召拜
司空轉太尉加侍中舉朝見司馬昭皆拜祥獨長

揖武帝踐阼拜太尉進爵為公

王覽字元通祥繼母弟方數歲見祥被楚撻輒涕
泣抱持祥漸有時譽母醜之覽覺徑取酒飲母遽
覆之自後朱賜祥食覽必先嘗母虐使祥妻覽妻
亦必趨共覽孝友名亞於祥應召累遷光祿大夫
唐畢誠字存中河南偃師人累官禮部尚書同中書
門下平章事早歲讀書舒州主簿山擇地葬親掘
地得石作潛山賦鐫於上

羅隱字昭諫餘杭人善詩賦避黃巢亂遊宿松與
楊顯友善寓其家又愛望江小茗山蓮花峯築廬
遯跡焉後官至諫議大夫朱溫篡位以前官名不
往往謁錢鏐勸舉兵討溫鏐雖不用其言甚重之
宋馮京字當世江夏人少讀書於皖之萬松山自鄉
舉至廷試皆第一時尚未娶張堯佐負官掖勢欲
妻以女力辭

楊萬里字廷秀吉水人中進士為零陵丞時張浚

謫永杜門謝客萬里請見之浚勉以正心誠意之
學因榜其堂曰誠齋累官秘閣修撰提舉萬壽宮
遂不復出愛潛山水常游寓於舒

龍仁夫字觀復江西永新人博學好古潜心理道
官湖廣儒學提舉晚居黃岡宋將呂文煥降元與
仁夫有舊文煥下江州仁夫過之招飲琵琶亭仁
夫即席賦云老大蛾眉負所天忍將離恨寄哀絃
江心正好看明月又抱琵琶過別船坐客皆掩泣

罷酒避亂卜居望江隱居著述所著周易集傳其
言多先儒所未發

金玉庭筠字子端河東人泰定間進士詞翰文彩照
耀一時晚愛皖之司空山嘗居其下自號司空行
窩寄者

元薩天錫泰定進士為燕南道廉訪司照磨登司空
山太白臺歎曰此老真山水精也遂結廬其下避
世終焉

朱公遷樂平人文公裔也至正間任金華學正以
道德文章名於世後同長子僉遷潛山

明李新之字湯銘順天人景泰丙午鄉薦任饒州訓
導左遷桐城竹子湖河泊所訪李公麟遺跡歎曰
山情水色正為我輩遂隱居龍眠

鄧宗經會稽人淹博工詩文成化間為潛學官纂
修郡志晚年高尚遂家於潛築頤老莊以自娛

國朝葉筠字竹君湖廣公安人也工詩文尤深性理諸

書明季屢辟不就擔簦遊四方至皖愛江山之勝
因寓居焉

施德裕字惟一雲南鶴慶府人明季為黃州府同
知城陷被執檢空囊知其庶釋之鼎革後寓望江
學圃蒔花木自娛足不履戶外

徽州府

漢管輅字公明平原人精易學為人筮卜言輒奇中
嘗學道祁門山中有管公壇廟

晉孔瑜字敬康山陰人以軍功封餘不亭侯惠帝末
歸鄉里後入新安山中改姓孫氏以稼穡讀書為
務忽舍去皆謂為神人立祠祀之

唐張志和字子同金華人肅宗時待詔翰林歸隱自
號烟波釣徒浮家泛宅往來苕霅間後寓居祁門
縣十都以終老子孫世居其地名張村

范傳正字西老鄧州人元和初刺歙州擢宣歙觀
察使改光祿未赴卜居休寧名其里曰博村誌孟

博後也

宋呂廣問字仁甫開封人丞相夷簡後為婺源簿靖
康南渡寓新安擢禮部侍郎密奏建儲之議孝宗
即位首疏十二事以病知徽州歲餘召對極論時
事朝論韙之

孔端木字子與道輔曾孫徽宗幸學訪先聖後以
行藝俱優特賜上舍出身建炎南渡注縣令因卜
築焉

馬廷鸞字翔仲饒州人贅婺源張氏遂居焉官至
觀文殿大學士

寧國府

晉劉遺民嘗居涇縣之水西有釣臺遺蹟

唐韓愈南陽人按朱子韓文考異文公有別業在宣城復志賦及歐陽詹哀辭祭十二郎文皆云就食江南蓋指宣也其示姪爽詩云宣城去京國里數逾三千念汝欲別我解裝具盤筵又云汝來江南

近里閭故依然則公之家居宣州有明徵矣今敬
亭山有昌黎別業祠祀之

白居易太原人元和中嘗寓宣城為宣城守所貢
兄沒葬城西五里今稱白府君墓居易祭烏江十
五兄丈所云宣城之西道傍荒草者也

呂從慶字世膺河南人避黃巢亂與弟從善隱歙
之竭田後從善留竭從慶入旌德萬山中所作詩
有吾亦陶彭澤之語卒葬珠婆塢

五代刁彥能字德明上蔡人父禮遇亂徙家宣州彥能少孤事母篤孝初在節度使王茂章帳下茂章叛吳歸吳越彥能不從而撫定其衆繼事徐知訓知訓忌烈祖屢欲加害彥能嘗陰護之烈祖代吳入為環衛後仕至撫州節度使

宋王邦憲周紫芝竹坡詩話云建炎南渡邦憲客宛陵與鄉人相遇作集句一篇

鄧道先南陽人乾道間官至尚書幕南陵山水卜

宅居焉

明石金字南仲黃梅人任御史嘉靖中諫止醮祠謫
戍宣州衛後赦還

湛若水字元明增城人嘗講學於宛陵

鄒守益字謙之安福人嘉靖初以編修議大禮謫
判廣德往來宛陵時貢安國戚袁梅守德等從之
遊講學之風遂冠江左

陳履祥字光庭祁門人得盱江之傳萬歷間倡教

宛陵嘗聚講於同仁會館及門八百餘人

陳文燭字玉叔沔人罷官後慕敬亭柏枧之勝僑寓二載

國朝姜埰字如農萊陽人明季仕給諫以抗疏劾周延儒予杖謫戍宣州遺命葬此以志死不違君之義

池州府

漢高獲字敬公汝南人少游學京師與光武有素師事歐陽歙歙下獄獲詣闕請歙帝雖不赦而引見

之欲用為吏獲辭去三公爭辟不應後遠遁江南
卒於石城石城人思之共為立祠

宋穆修字伯長汶陽人官海州理掾恃才忤監郡者
坐削籍隸池州後遇赦除潁州文學參軍修傳陳
搏易學又首倡為古文

滕宗諒字子京河南人范仲淹薦其才擢左司諫
謫監池州酒稅樂九華之勝於雲外峯下築書堂
以居

曹清字立甫寧晉人歷起居舍人天聖中謫知彭澤縣過貴池愛東源山水遂棄官築室以居

沈遼字獻達錢塘人初受知王安石及新法行遼與論事多不合久之攝華亭令使者以夙憾劾之奪官流永州更赦徙池州歷九華秋浦玩其林泉喜曰使我自擇不過爾耳即築室齊山上名曰雲巢有雲巢集

孔武仲字常父新淦人元祐中官著作郎論科舉

之弊詆王氏學請復詩賦取士歷寶文閣待制知
宣州後坐元祐黨奪職居池州卒

太平府

唐李白字太白隴西人天寶中以才名供奉翰林院
明皇愛其才數宴見常侍帝醉使高力士脫鞵力
士恥之擿其詩以激楊貴妃白自知不為所容懇
求還山帝賜金放還常乘舟與崔宗之自采石至
金陵著宮錦袍坐舟中旁若無人安祿山反轉側

宿松匡廬間坐永王璘事流夜郎會赦還李陽冰
為當塗令白往依之白晚好黃老渡牛渚至姑孰
悅謝家青山欲終焉卒葬東麓

宋石待問字則善眉山人七歲通四聲嘗賦石上松
曰何當為柱石同立太平基時以公輔期之舉進
士及制科進諫史百卷真宗大悅仁宗時判太平
州上書言邊事召對稱旨授太常丞知階州尋引
年致仕卜居蕪湖戒子孫當以儒學忠義自立嘗

曰吾生平仕宦十步九蹶命也顧身無玷缺耳皇祐三年卒知州黃庭堅表其墓子禹勤

李之儀字端叔滄州人舉進士元祐中為樞密院編修官能詩善屬文蘇軾帥定武辟置幕下范純仁卒之儀代草遺表蔡京構以罪編管太平州自號姑溪居士有姑溪集

杜俟字碩甫成都人崇寧間侍父宦江寧遂家蕪湖嘗從蘇軾遊有詩名

韓元傑字漢臣億五世孫靖康間以蔭選知臨潁
大帥劉光世奇之拔授監軍時戚方李侁各擁兵
懷反側朝廷遣使撫諭莫敢前傑匹馬扣寨酣飲
連日遂受降後知濠州破劉麟兵進秩移楚州後
與弟元象同居蕪湖

王淇字德機豫章人紹興初避李成亂徙家蕪湖
資敏而學博尤精毛詩春秋所交皆知名士

陳規字元則安邱人以新科明法出身任法曹調

邑令靖康初勤王有功以疾請祠居當塗後知順
昌堅城積粟以助劉錡大破金兵歷淮西安撫使
卒

楊宏中字亢甫福州人弱冠補國子生韓侂冑竊
弄國柄竄趙汝愚於永州李祥楊簡連疏救者俱
被斥宏中與同舍林仲麟等五人伏闕上書侂冑
大怒將竄之嶺南余端禮丐免上惻然乃送太平
州編管時號六君子

明張慎言字金銘陽城人自曹縣令入為御史忤逆
璫謫戍甘肅崇禎時初起太僕少卿歷南京吏部
尚書甲申後僑居蕪湖寄食蕭寺繙經禮佛瓢衲
蕭然尋病卒

廬州府

漢施延沛國人避地廬江種瓜為業明於五經星官
風角家貧母老周流傭賃順帝時徵拜太尉

宋楊繪字元素綿竹人皇祐間擢進士第一仕至天

章閣待制嘗寓無為州山中自號無為子

劉筠字子儀大名人真宗朝守廬州愛廬山水因築室城中構閣藏所賜詔誥仁宗飛白書真宗聖文秘奉之閣八字以賜之

謝枋得字君直江西弋陽人宋亡隱無為之南鄉州人知之相與建樓城隍廟左迎居之事以師禮後潛往江南遂為薦者所逼不屈而死

元蔡章洛陽人任閩省員外郎至正丁未越海北歸

遇大魚推舟漂流七日從台州登岸至舒城遂家焉

明陳壽字本仁新淦人成化進士官南兵部侍郎廉聲素著徙居合肥作詩曰買田陽羨原無計問族舒廬舊有因癡兒能識癡翁意但道歸來不道貧

鳳陽府

唐尉遲恭字敬德歸唐為開國元勳封鄂國公後居定遠縣東鄉子孫世為定遠人墓在石羊岡

王質字華卿河汾人文中子四世孫寓居泚水上
宋呂龜祥太平興國二年進士及第為殿中丞知壽
州有惠政民愛留之不忍舍去遂家焉

明唐肅山陰人元至正壬寅鄉薦授嘉興路學正明
初以例徙濠州應薦召修禮樂書擢國史編修官
以疾失朝謫佃於濠之瞿相山卒著有丹崖集

國朝李彬明季仕定遠知縣歷官河南巡撫先是定人
為彬立有生祠國變遂移居焉出入一蹇一僕混

跡稠人中莫知其為前代開府也

潁州府

唐段珂沂陽人秀實孫僖宗時寓居潁州黃巢圍潁
州刺史欲以城降珂募少年拒戰賊遂潰拜州司
馬

宋王回字深父侯官人父平言宦潁州卒葬汝陰遂
家焉舉進士為衛真簿自免歸以學行見知歐陽
修薦授將作監主簿為人敦行孝友質直平恕取

舍進退必度於仁義與處士常秩友善熙寧中秩上其文集補回子汾為郊社齋郎

歐陽發字伯和歐陽棐字叔弼歐陽辯字季默俱廬陵人父修知潁州愛其風土遂卜居焉發少師事胡瑗得古樂鐘律之說不治科舉文字自書契以來君臣世系制度文物天文地理莫不究悉以父恩補將作監主簿賜進士出身累遷殿中丞棐廣覽強記能文辭蔭為秘書省正字登進士修卒

代草遺表神宗讀而愛之意修自作也後坐元祐黨廢發早卒辯與斐屢見於蘇軾在頴唱和之詩劉攽字貢父臨江人官屯田員外郎喪父時歐陽修守頴攽往依之相與賡詠有詩云羈鳥能擇木遊魚知赴淵卜居幸樂國負郭依良田

和州

宋彭思永字季長廬陵人治平中為御史中丞力論濮議稱親之非英宗感動後以戶部侍郎致仕寓

和州卒子衛居父喪哀毀以孝聞通判趙州有清節

呂希哲字原明河南人申國公公著子為人端重有至行歷崇政殿說書開導哲宗皆理學要言紹聖間坐元祐黨謫居和州靜坐一室怡然自得嘗賦詩有除却借書沽酒外更無一事擾公私之句龔原字深父處州人歷官寶文閣待制經術粹深每朝有大議輒援古禮以對崇寧中陳瓘彈蔡京

得罪原坐與瓘友善落職謫居和州起知亳州命
下而卒

明危素字太璞金谿人仕元歷翰林學士承旨博學
善文辭朝廷大制作多出其手入明為侍講學士
謫居和州卒含山旅舍

廣德州

宋王機字仲達宛陵人建炎兵訐徙家建平仗義好
施贍恤宗族歷官修武郎尚濮王嗣永康縣主嘉

定八年歲饑部使者真德秀貽帖易粟機慨然應之溪南饑民全活甚衆

盛瑞字晉祥中宣和進士紹興中愛不老泉之勝卜居焉

趙時晦寓居廣德州死元兵之難

明王叔英字原采黃巖人以翰林修撰旅出廣德聞靖難師入沐浴具衣冠自經賦絕命詞云人生霄壤間忠孝貴克全嗟余事君父自省多過愆周粟

豈不佳所見良獨偏高蹤遠難繼偶爾無足傳千秋史臣筆慎勿稱希賢道士盛希年依其遺筆葬之祠山之陽正統間楊士奇題其墓而祭之

六安州

宋汪澈浮梁人立信從祖進士累官至樞密院與立信曾大父智宣諭湖北道六安愛其山水因居焉明史洪謨字經三原籍廣寧僑家於六辛未登進士知宜陽縣罷歸乙亥春流寇突至州守以公事出

人心惶迫洪謨慷慨登陴奮勇禦敵城賴以完

江南通志卷一百七十三

欽定四庫全書

江南通志卷一百七十四

人物志

方外

一

江蘇松常鎮淮揚徐八府太海二州

江寧府

漢茅盈元帝時隱句曲山學道遇至人授以仙術盈
弟衷為西河太守固為執金吾各棄官來就兄皆
得道世稱三茅君山為茅山

三國康僧會西域康居國人赤烏四年至建康時中國未有像教會始誅茅設像即秦淮西南建初塔寺藏所謂舍利江左之有僧刹自會始

葛仙翁句容人姓諸葛名元嘗從吳主至溧州遇大風百官舟俱沈翁獨立水上衣履不濕

晉許邁句容人少恬靜不慕仕進學升遐之術於鮑靚常服氣一氣千餘息登巖茹芝渺爾自得獨與王羲之友善羲之述其靈異之迹甚多後更名元

莫測所終

吉友西域沙門晉元帝永昌中至東土常行頭陀
行卒於梅岡詔于塚邊立寺號高座道人

竺法汰止瓦官寺講放光般若經帝臨幸公卿畢
至

南北朝宋求那跋摩中印度人元嘉中居金陵祇園
寺文帝嘗問曰朕嘗願持齋不殺生命對曰帝王
所修與凡庶不同出一嘉言則士庶咸悅布一善

政則神人以和刑不夭命役不勞力則暘雨時若
百穀滋繁以此持齋齋亦大矣以此不殺利亦多
矣安在輟半日之餐全一禽之命然後為弘濟耶
帝撫几稱善

梁寶誌金陵東陽民朱氏婦上巳日聞兒啼鷹巢中
舉以為子七歲依鍾山僧儉出家專修禪院梁武
帝嘗詔張僧繇寫其像誌以指勢面門分披出十
二相或慈或威僧繇竟不能寫葬鍾山獨龍岡

初祖達摩南天竺國香至王第三子梁普通七年
至南海武帝遣賫詔迎至金陵後折蘆渡江止嵩
山少林寺

陳天台智者華容陳氏子謁慧思禪師悟法華三昧
陳宣帝大建七年抵建康詔居光宅寺後憩廬山
桓闔執役陶弘景十年不懈有白鶴集庭乘鶴沖
舉

唐張果老六合園叟也後攜妻至王屋天壇山仙去

法融延陵韋氏子入牛頭山幽棲寺石室修道入
頓宗為牛頭第一世祖

慧忠牛頭宗第六世終身一衲一鐺嘗有供僧穀
二廩虎為之守移居莊嚴寺學衆雲集

南唐女冠耿先生玉貌鳥爪常著碧霞帔因宋齊邱
進嘗見宮婢持糞埽謂元宗曰此物勿棄置鐺中
烹鍊良久成白金冬天令宮人握雪成錠投火中
亦成白金指痕猶在又能燭麥粒成珠以縑囊貯

白龍腦懸之滴液香味逾于大食國所進龍腦油
遂得幸於元帝有娠將產之夕雷雨震電及霽娠
已失矣久之宮中忽失其所在或云猶見之江淮

間

明周顛仙冷謙張三丰三人高帝時先後至金陵其
事蹟屢有靈異世俗所喜道不具書

焦姑家中和橋南有仙術永樂初封妙惠仙姑

道成雲州人弘洞宗於靈巖洪武中命住天界寺

宗泐臨海周氏子元末隱徑山洪武元年應召主
天界寺

碧峯乾州石氏子聞法要於如海真公游憩峨嵋
趺坐樹下溪水暴溢七日水退趺坐如故高帝召
至京師設普濟會

永慈蜀余氏子至牛首領衆三載傳東明和尚衣
法

洪恩字雪浪金陵黃氏子出家長干寺以無師智

得大辯才盡掃訓詁單題本文拈示言外之旨南
北法席之盛近代未有

大藏龍舒沙氏子崇禎時於天界寺高提祖印廣
度羣品

古心溧水人從素菴于金陵棲霞寺得法時三懷
師重修報恩塔頂不能上夢神云待波離尊者至
次早師至三拜而頂即上

本咸蜀人重興金陵東山翼善寺緇素皈心

蘇州府

周赤鬚子鄴人秦穆公時主魚吏每言灾異悉驗後
往吳中不知所之抱樸子云以其鬚髮皆赤故名
漢魏伯陽吳人好學不仕入山煉丹相傳以為得仙
作參同契五行相類等書

蔡經吳人家胥門王方平既得道欲東入枯蒼過
吳憩經家以其骨相當仙授以要言經得尸解去
至今蔡仙鄉有丹竈

晉支遁字道林居吳支硎南峯院好鶴又好名馬今放鶴澗馬跡石皆遁遺跡

竺道生嘗遊長安從什公受業後居虎邱人無識者乃聚石為徒坐而說法石皆點頭今虎邱有點頭石

南北朝宋陸修靜字元德吳人學仙棲廬山白雲寺與陶潛慧遠結白蓮社嘗握手過虎溪大笑而別世傳三笑圖宋文帝召見之不得元徽中偃月而

化

梁蜺子和尚京兆人天監中住洞庭山沿江採掇螺蜺以充腹靜禪師往勘之捉其衣曰如何是西來意答曰神前酒臺盤靜曰不虛與我同根生

誦尊者天監中往虎邱泉隨湧出名誦泉

唐周隱遙字息元西洞庭道士自言角里孫學煉形術死戒弟子護其屍凡死而復生者三至八十餘猶似少壯貞觀中召至問道對曰所習皆匹夫事

功不及物非萬乘所宜問也放歸

文暢吳人與韓愈柳宗元善愈為作送行序

明覺顯號雪竇居莫釐演法有龍出井而聽時集
千僧有天衣願汲水供衆示寂後白蓮湧出今有
天衣禪院龍潛井皆其遺跡

宋遇賢東禪寺僧姓林氏嗜酒人呼為林酒仙能前
知言人禍福悉驗郡有虎賢騎出城害遂息明祝
允明書其所詠詩刻石寺中今尚存

文瑩吳僧多聞博識著湘山野錄

惠詮吳詩僧語清絕嘗書西湖寺壁云落日寒蟬
鳴獨歸林下寺柴扉應未掩片月隨行履惟聞犬
吠聲又入青蘿去蘇軾愛而和之

道元住永安禪院祥符中嘗進纂傳燈錄三十卷
詔學士楊億等刪定刻板宣布

申元道師事徐神翁得修煉術將出遊師示曰逢
虞則止無雪則開渡江至虞山即築菴居之山苦

無水一日大雪菴前覆簣不積浚之得泉因名雪井

元了通栖智林寺嗜酒一日通州狼山寺火衆見烈焰中有僧嘆酒滅之自稱了通和尚其火燼皆帶酒氣明日衆渡江詣謝了通力辭無之未幾沐浴而逝

宗衍字道原吳人至正初住石湖楞伽寺善為詩一時名士多與遊所著碧山堂集危素序而傳之

明時蔚號萬峯年十一誦法華有省後得法於千岩
洪武間詔徵使至示寂已七日

席應真常熟人奉母至孝學老氏善易兼通兵法
僧道衍師之盡得其傳

萬金字西白吳郡人姚氏子依寶積院宗衍為弟
子後住瑞光寺洪武初起住持大天界寺召入禁
廷奏對稱旨兩建法會於鍾山命總持齋事大駕
臨幸六年冬示寂宋濂謂寂照之子孫各主名山

大暢宗旨萬金亦其一也

良琦字完璞吳郡人自幼讀書性操溫雅學禪白雲山中後住天平山之龍門楊維貞云良琦既究禪理兼通儒學能詩特其餘技耳

胡道安吳江人性狂戇人呼胡風子為元妙觀道士遇異人授五雷法洪武末吳中旱延之禱雨登壇怒罵陰雲四合雷雨大作

道衍字斯道長洲人相城姚氏子出家妙智菴從

高啓輩為詩在北郭十子之列所著有逃虛子集
洪武間以高僧召命侍燕邸靖難時贊助祕密太
宗即位授資善大夫太子少師復姚姓賜名廣孝
輔太子南京命蓄髮再三終不肯賜兩宮人亦不
近永樂六年朝北京居慶壽寺病篤車駕臨視明
日端坐而逝僧夏八十四追封榮國公謚恭靖
張皮雀長洲人師胡道安盡得其術禱雨驅祟立
應常束雙髻手持皮雀日引羣兒為戲故名

福懋字大林竹堂寺僧少有戒行畫學倪瓚書宗
智永嘗遊文徵明之門聲名籍甚詩有弘秀集風
致

法藏號三峯嗣法天童初住鄧尉繼主開元度僧
百餘受戒萬衆得法者十二弟子具德繼起最著
通門字牧雲嗣法天童後住破山能詩文善書有
懶齋集

明河字汰如通州人耽詞翰窮內外典後住中峯

二十餘年手不停披口不撤講所著有楞伽解
真可字達觀又號紫柏尊者吳江沈氏子薙髮虎
丘寺後入都賜紫伽黎妖書事起逮下詔獄曰世
事如此久住何為索浴說偈堅坐而逝

國朝弘儲字繼起通州李氏子也受法於三峯稱為臨
濟荷擔真子徧歷諸刹順治辛丑始居靈巖吳偉
業輩多皈依門下徐枋謂其與聖賢道合注念君
親自來善知識中無有也

正志姓熊名開元湖廣嘉魚人前明進士官給事中
以建言廷杖鼎革後披薙隱匡廬南嶽間自號
藥菴後遇弘儲從至靈巖受印記居華山有藥菴
語錄十二卷時有趙庾吳江人前明進士官知縣
明亡後披薙為僧參弘儲為其高座

道源字石林婁江許氏子住虞山嘗注李商隱詩
朱鶴齡作箋多採其說

施道淵字亮生吳縣人年十七禮龍虎山學五雷

法後築室吳山修煉復住持穹窿凡興建名勝一
百七十餘所塑像八千二百有奇復修蘇之元妙
觀臺殿樓閣傑立雄峙所費鉅萬分文無私蓄康
熙丙辰入都設醮大著靈異還山卒

大涵字雁黃吳江潘氏子九歲為僧長參靈巖弘
儲從遊南嶽歸愛台歛山水之勝遂卓錫焉在黃
山躬耕聞嶺半伐木聲忽有悟口占一絕語透宗
旨自是作詩有名後主海寧安國寺席復出遊羅

浮歸至肇慶示微疾說偈而逝

松江府

唐王可交華亭人業耕釣三月三日掉舟入江忽見
中流有綵舫載道士呼可交上舫與二栗食之甘
如飴命黃衣送上岸覓所乘舟不見乃在天台瀑
布寺前問寺僧今何時答言九月九日矣自是絕
穀往四明山

德誠嘗乘小舟往來松江朱涇人以船子和尚呼

之夾山善會禪師至華亭參船子大契宗旨辭行
回顧再四誠豎橈曰汝將謂別有處耶覆船入水
而逝

宋德聰姓仰氏太平興國中結廬佘山之東峯二虎
為衛名大青小青有禪者造之見掛佛經梁間問
嘗讀否答曰如人看家書既知之矣何再讀為天
禧元年跌坐而逝閱月貌如生

慧辯字訥翁華亭傅氏子生有異父母令入普照

寺出家得法於天竺明智久之遂領寺事熙寧中
蘇軾作杭倅與辯為方外交及示寂作詩哭之

惟正字煥然華亭黃氏子五歲見佛書能識其字
長入杭之北山跨黃犢出入內翰葉清臣收金陵
迎往優禮之作偈辭去皇祐元年四月佛誕日忽
語衆曰夫動以對靜吾一動六十有四年今靜矣
語既而瞑

智儼居上海靜安寺見漁人捕鰕買一斗噉之及

索錢儼徐云還汝鰕隨吐活鰕盈斗人皆駭異號
鰕子和尚將示寂斂蒲草為萬餘繩懸諸廊廡曰
吾將大作緣事繼即坐脫人競施以錢懸繩皆滿
遂以建佛閣

明顛姓薛氏猖狂若顛衣不蔽體或遺之衣則轉
施人大雪中亦然不學能詩倭奴見之羅拜云曾
在海中失風得此僧幸免於死

可觀字宜翁華亭戚氏子祝髮邑之寶雲寺紹興

間主當湖德藏徑山大慧來訪對語終日嘆曰教
海老龍也

元淨真字如菴華亭沈氏子童齒授以法華歷耳成
誦出家受具博究諸乘參訪尊宿盡得宗旨因嗣
法席已遷華亭超果寺至順辛未舉為上天竺座
主賜號佛心弘辯

明彭宏大號素雲生元時得棲神鍊氣之旨洪武中
至細林山結茆居之一日沐浴更衣趺坐問左右

何時曰正中遂翛然而逝太祖來召知己羽化啓其竈視之正身不倚長爪遶身

德然號惟菴華亭張氏子生具異相七歲誦法華經於杭之天龍寺參洪石屋洪屬以緣在吳松為書松隱二字遂歸郡南結菴以居題曰松隱洪武初以高行僧薦尋還松隱有船居詩學士宋濂為序

紹宗字一原上海陳氏子戒行精嚴緇素嚮化洪

武中應召奏對稱旨賜金縷僧伽黎等服自右講
經遷右善世

朱蒲包上海沈氏僕十八為寶山募兵遇異人授
藥一丸服之遂不覺寒暑飢渴身衣破衲冒以蒲
包人呼蒲包仙行必挾四竿夜宿植竹四隅而卧
其中市人釀酒敗挾竹攪甕輒變為甘生平不談
禍福或無意吐一語必奇中

張癡六華亭人行六以不修繩檢人呼為癡六日

遊行市中夜或僵卧橋上雖大雨不需霜晨雪夕
氣蒸蒸起也黃面碧眼齒平如礪常蓬首不盥櫛
與人言多不可解然卒有奇驗

常州府

南北朝王八百隱橫山修道歲久白日飛昇人為立
登仙觀後改為沖虛南唐徐鍇有碑記其事

唐毛萇不知何許人游宜興張公洞自洞底東至太
湖中洞庭山得石穴而出萇言在洞中東行聞頂

上有風波聲及舟人語今山上有毛公洞

湛然姓戚氏宜興人初往越州晚歸天台山傳天台教天寶大歷間累詔徵不起一日說法隱几而化吳越時追謚圓通尊者

宋歸真大中間棄官學道隱橫山茹芝絕粒三十年朝夕諷誦蛇兔馴伏

劉混康少遇異人授以呪術治疾輒驗宣和中賜號靜一先生棲真于宜興華陽道院建炎二年于

邑西門外插蘆于地枯蘆成葦遂創建會真菴

元永寧號一源俗姓朱初棲毘陵焦子山精修禪定
後復至淮西印正于無用禪師忽有省悟至治癸
亥至宜興龍池山建禹門禪院居焉有白虎馴伏
于前故又名伏虎巖

明正傳號幻有溧陽呂氏子得法笑巖禪師棲五臺
山靜修十三年後住宜興龍池說法為臨濟正傳
宗風大振

圓悟號密雲宜興蔣氏子侍正傳于龍池付受衣拂後凡六坐道場于金粟天童最久大闡宗旨緇素欽仰崇禎中詔賜紫衣修南京報恩寺命為住持以老疾辭

任聃年宜興人溧陽太清觀道士崇禎甲申之變聃年備法衣加衰詣縣治舉哀禮成遍別所知言分當死設三日醮入玉華山端坐而逝

國朝覺譽號天隱宜興閔氏子也年二十四薙染與圓

悟同師正傳因閱楞嚴頓成觸悟先開堂磬山禪院後住武康報恩寺宗風之振亞于圓悟順治中示寂有塑像在磬山

通琇字玉林江陰楊氏子年十九薙染久侍覺譽嗣其法席凡六坐道場七會說法順治中嘗再召至

禁廷禮遇優渥賜號大覺普濟能仁國師

鎮江府

晉沈建丹陽人學却老法嘗遊行寄奴侍驢羊於主人各與藥一粒語主人曰不須飲食也去後主人飲食之皆不受三年還又各與藥飲食如故後不知所在

唐羅睺丹陽人生無雙目而能鑒物於太和中鑄鐘咸通中建塔雖屢經兵火不燬人多異之

裴頭陀相國裴休子也生而胎素穎異不羣休作文送其出家行頭陀行來潤之金山北巖有蟒頭

陀入洞禪觀蟒遂去後莫知所之

魏隆字道真居京口之仁靜觀修正一法卒葬馬
跡山踰數月人有遇之者啓其棺一鶴飛入雲中
獨冠劍存焉

殷七七擅異術周寶鎮浙西時鶴林寺有杜鵑花
寶謂七七曰鶴林之花天下奇絕嘗聞能開頃刻
花可副重九宴會乎七七曰諾及九日果爛漫如
春遊賞既罷花忽不見

惟良丹徒人劉禹錫送惟良上人詩序有曰唐繼
天德有外臣一行刊歷考元書成化去繼是丹徒
惟良生而能之以乾坤之策當十期之數凝神運
指數起於復之初九音生於黃鐘之宮積微本與
元化合李端盧綸俱有送惟良南歸詩見潤州類

集

宋張紹英丹陽人自為道士不入城府仁宗思接方
外之論屢召俱稱疾不起賜號明真先生勅所居

菴為天聖觀一日沐浴更衣扃戶而化

湯志道丹陽人讀書負奇氣髻髻跣足坐大茅頂三十年淳祐五年秋大旱召赴闕禱雨賜號靈寶先生臨化說偈有云笑入寥天一乃一笑辭世

翟志穎字叔同丹陽人年十三入華陽洞之西便門遇道士指石壁題名謂曰汝姓名在宗師之列因顧石壁失其人後果傳印劍號觀妙先生

智覺本丹陽人少誦法華初為縣衙校多折官錢

買放生生命罪當死引赴西曹顏色不變乃貸命為
剃髮受具持頭陀行號永明壽禪師集諸經論為
書一百卷名宗鏡錄

曇穎住金山號達觀嘉祐四年除夕命侍者持書
別刁景純學士曰明旦當行不及相見景純復書
將及岸穎欣然命撾鼓升座叙出世本末長謝衆
僧上方丈跏趺而化

了元饒之浮梁人號佛印住金山與蘇軾善嘗贈

軾衲裙軾酬以玉帶李伯時為元寫照元曰必作笑狀一日聽客語有會心軒渠一笑而化

克勤嗣五祖演號佛果初與演語演皆不應因忿然去演曰待爾熱病時方思我克勤至金山有寒疾困極追繹演言復歸五祖尋於言下有省建炎初住金山賜號圓悟大師時堂上僧一十八人皆大徹因名大徹堂云

元優曇丹陽蔣氏子住丹陽妙果寺至大初詔罷蓮

宗優曇著蓮宗寶鑑十卷上書仁宗乞復其教允
之仍命為教主賜號虎溪尊者揭傒斯銘其塔

明常欽字惟心金壇王氏子生不食肉穎異過人為
僧住儀徵天寧寺洪武初住甘露聽法者千餘人
一日忽斂經衲諸物遺其徒書偈而逝

慧昂字東明丹陽王氏子永樂間入錢塘古道山
住持為開山第一祖

淮安府

宋孫賣魚不知其名賣魚楚州市極暑中過一道士
語曰汝魚餒矣能飲我可使魚活遂飲以斗酒因
與談論自是言人禍福輒應宣和中召至京師賜
號塵隱處士復還楚靖康初忽於亳州太清宮號
吽大哭人莫之喻有記其時日者乃汴京陷之日
也後不知所在

婁守堅漣水人修佛行人以道者目之生有異相
掌中有一目中指七節為承天寺僧佯狂不事誦

習能逆知禍福召入禁中仁宗初生晝夜號哭不止僧摩其頂曰莫叫莫叫何似當初莫笑啼遂止郡有白龍潭于澳河僧恐久而蕩溺居民以錫挑之曰逢柴而止龍去東南四十里至柴溝潭而居焉

水丘秀才本州人自郡庠歸遇一異人忽有所悟張商英招致之而莫知其夜所宿處密伺之見於紫極宮倚壁酣睡一日徧辭里巷卒於儀徵後有

州兵見於蜀始知其尸解云

揚州府

漢朱璜廣陵人遇睢山道士阮邱曰卿除腹中三尸可授真人之業與藥七合授黃庭經隨邱入浮陽山後八十年復見白髮轉黑至武帝末猶存

南北朝梁王治泰州人隱天目修靈寶法煉丹存神歷宋齊梁百餘年白日飛昇

唐王遠知揚州人少事陶弘景傳其術為道士陳後

主召見辨論超詣隋煬帝執弟子禮見之唐武德
中見秦王曰方為太平天子願自愛貞觀九年詔
潤州即茅山為觀俾居之卒年一百二十六歲子
紹業

李珣廣陵人販米為業每斗求利二文資父母養
有糴者輒授以升斗自量丞相李珣節制淮南夢
入洞府見石壁金書姓名有李珣字心竊喜傍有
二仙童云此非君乃江都部民耳卒年百有餘歲

劉白雲江都人好濟人遇道士樂子長與書兩卷
能役致風雨變化萬物乘馬走水上如履平地乾
符中猶賣藥長安市

宋顏筆仙高郵人建炎初鬻筆遇仙凡得其筆者剖
視管中必有詩紀其破毀歲月及人姓名禍福皆
驗年九十二積葦自焚人見其乘火雲飛昇去

徐守信泰州人白日上昇有丹井遺蹟在徐州蕭
縣宋寧宗封虛靜沖和先生

戒禪師住揚州石塔與蘇軾有問答機緣

明文銘正德間祝髮泰州東寺每入定能言未來事
年六十六預告涅槃日至期吐三昧火焚化

行修泰州人陳姓壯年出家操苦行見人與物輒
拜一日入寺謂住僧曰我某日當寂至期坐龕中
擊魚念佛須臾輕烟一縷起鼻端兩耳火出自焚

徐州府

周琴高居香城泗水中善鼓琴行彭涓之術浮游梁

碭間二百餘年後入碭水娶龍子乘赤鯉出入

漢張陵字輔漢豐人七歲通道德經舉賢良方正不就入蜀得九鼎丹經通變化驅除之術受上真秘錄桓帝永壽元年與妻雍氏白日昇舉

晉彭宗彭城人嘗從師採藥忽墮深谷蹈羣蛇曾無懼色師乃授丹經五千文宗竇而修之洞暢幽漠能三晝夜為一息或一年不動人以為死及起顏色愈鮮好

王元甫學道於赤城霍山服青精石飯得吞日精
丹景之法內見五臟穆帝永和年白日昇舉為中
嶽真人

宋曹國舅紹聖四年蟬蛻於縣東南五十里玉虛觀
更名騰雲寺

元洞真子涿州人姓邱年壯學道游鄒嶧山師丹陽
真人道侶號為洞真子來游碭山遇趙志堅建聚
仙宮為本宮提點延祐乙卯人見其西去弟子志

堅闢戶視之羽化矣

明劉淵然蕭人遇異人授以祕書呼召風雲効治鬼物太祖建西山道院居之昭帝賜以御書號曰長春真人後跌坐而化朝廷遣官致祭翰林胡儼為作傳

李旺沛人少過城隍廟見衲子坐神像下與旺語合遂得異術嘗遊金陵過逆旅求宿主人不納旺即跌坐門外會夜大雪主人以為不耐寒死矣早

啓門視之旺所坐處三尺內無片雪始異而留之
旺竟謝去後死翌日有人見之豐縣某處殆尸解
云

太倉州

宋如茂號柏巖住嘉定南翔寺德祐中示寂前三日
貽書邑令朱象祖與訣如期坐逝作偈云鉄船到
岸苦海波息快哉時兮風清月白

歐法師嘉定人紹興中有雲遊道士授以符訣自

此醮祀伏壇屢著神應

莫起炎字月鼎苕溪人生宋寶慶間精五雷法酒
醉輒佯狂詬詈呼役雷霆至元中宋濂為碑文楊
維貞為立傳久居嘉定正統間猶在後莫知所終
元柏子庭能詩浪迹雲遊乞食嘉定村落語雜諧調
一日偶觸某官騶從縛至知為子庭命賦所張蓋
應聲云百骨攢來一線收葫蘆金頂蓋諸侯一朝
撐出馬前去真個有天無日頭某官笑而釋之

太倉丐者延祐初道服操瓢往來水軍寨及張涇
馬頭飲醉輒呼牛來又於寨門上連書火字人皆
詈而扶之是冬海賊牛大眼劫太倉水軍寨張涇
馬頭俱火災始知丐者非常人

明覺曇住崇明慈濟寺言未來事奇驗或卧榻中有
見其行於市者人皆稱覺菩薩坐化月餘面色如
生

國朝呂必字貞九嘉定人也築樓居妙高峰得辟穀法

已遊終南樓居為僧所占歸不與校別構方丈於
小桃源兼修隱形煉虛之道康熙甲辰先期築石
穴至期捻訣坐化

海州

漢王遠字方平東海人舉孝廉歷官中散大夫後棄
官入山修道桓帝時連徵不出令郡國逼載至京
閉口不語題四百餘字於門皆方來事削去復見
還鄉居太守陳耽家四十餘年一日忽語曰吾期

運當去為具棺衾斂之一日忽失其尸衣冠不動
若蟬蛻云

晉鮑靚字太元東海人學兼內外明天文河洛書為
南海太守嘗煮白石以食見仙人陰君授以道訣
年百餘歲

宋莎衣道人朐山人姓何避亂渡江舉進士不中紹
興末至平江身衣白襴久之衣益敝緝以莎臨池
見影豁然大悟言休咎奇中有療者求醫命持一

草去旬日愈求而不得者不起遠近異之孝宗連
召不至賜號通神先生

進公不知何代人築菴胸山麓夜則行於市抵暮
則隨五犬陟山巔而返囊置果餅沿路飼之因歲
旱語人曰我能致雨人戲請之果獲大雨而犬不
復見山巔有潭當時謂犬即潭之五龍云

江南通志卷一百七十四

欽定四庫全書

江南通志卷一百七十五

人物志

方外二

安巖寧池太廬鳳潁八府滁和廣六泗五州

安慶府

周匡續字子孝嘗乘雲入關師事老子棲隱潛山至今有遺蹟

秦華子期九江人隱潛山從角里先生受仙隱靈寶

方返老還少日行五百里能舉千觔一歲十易皮
如蟬蛻後昇仙去

漢樂長子齊人少好道遇仙授方告曰蛇服為龍人
服為童年一百八十色如少女修煉潛山號潛山
真君遺跡猶存唐明皇有贊

南北朝梁白鶴道人武帝時方士愛舒州潛山奇絕
時浮屠寶誌亦愛之武帝命二人各以物識其地
得者居之道人以鶴止處為記寶誌以卓錫處為

記已而鶴先去忽聞空中錫飛聲遂卓於山麓而
鶴止他處各因所識築室焉

隋二祖初名神光初祖與改名為慧可求法於達摩
受衣鉢為二祖其後付法於璨為三祖嘗來司空
山建刹其上至今有傳衣石葫蘆石祕記靈跡存
焉

三祖名璨得法於神光遂隱舒州皖公山十餘載
無知者至隋開皇間有沙彌道信謁曰願和尚慈

悲乞與解脫法門璨曰誰縛汝曰無人縛曰既無人縛何更求解脫道信言下大悟後亦傳衣鉢為四祖

唐呂嵒號洞賓嘗在桐城呂亭驛遇一孝婦取水事姑至此息肩指示之曰此間自有甘泉不須遠取遂拔劍劃之泉湧出至今方池數武大旱不竭名洞賓泉又嘗遊浮山雪浪巖題云褰裳懶步尋真宿好景一時觀不足月在碧空風在松何必洞天

三十六

何仙姑初桐城投子山大同禪師每溺有鹿來飲
久之鹿產肉毬裂開乃一女師育至十二歲牧童
戲以山花插其髻師乃令下山囑曰遇柴則止遇
何則歸至柴巷口何道人家遂棲之以何為姓慎
守師戒修持覺悟師使趙州召之女方浙即持策
簞往先至見師坐左趙州至坐右三人一時化解
今投子山有趙州橋柴巷口有仙姑井

間邱方遠宿松人修貞匡廬唐昭宗屢召不起賜
號妙有大師景福中居餘姚天滌洞錢鏐奏請賜
號元洞先生天福中尸解後有見於天都山者
幽大師出入跨虎坐化真身在值雪山

大同懷寧劉氏子謁翠微頓悟結茅投子山住三
十餘載中和間巢寇起有狂徒持刃問師曰住此
何為師乃隨宜說法渠魁拜伏乾化四年示寂賜
謚慈濟大師

宋遠錄公住浮山華嚴寺歐陽修造其室與客圍棋
師旁觀之歐遽收局請因棋說法師即搥鼓陞座
衝口而成歐謂僚友曰初以禪語為虛誕今見此
老機緣亦是悟明心地年七十餘歸寂

義青懷寧李氏子七歲出家習百法論長入洛聽
華嚴義若貫珠至浮山三年遠錄公時出洞下宗
旨示之悉皆妙契

李斯立居東山靈仙觀善丹爐年八十常從蘇軾

黃庭堅遊能詩如崑溜連雲凍溪梅帶雪香等句
人多傳之觀至今名仙人洞

全舉得法汾陽遍歷諸方後示衆云釋迦不出世
達摩不西來佛法遍天下談宗口不開傳燈錄載
舒州法華院今在宿松治東五十里

守端衡陽葛氏子幼事翰墨依茶陵郁披荊參揚
岐言下大悟尋遊懷寧結茅唐山之西守令慕道
請師主潛山太平寺及宿松法華寺法席嘗作蜂

子透憲偈云為愛尋光紙上鑽不能透處幾多年
忽然撞著來時路始覺從前被眼瞞

法眼徧參名宿最後依白雲端師一見即問南泉
摩尼珠話端叱之師大悟獻投機偈曰山前一片
閒田地叉手叮嚀問祖翁幾度買來還自賣為憐
松竹引清風端時印可師主司空山四面山海會
寺潛山太平寺諸法席有語錄行世

佛鑑舒州汪氏子久事演禪師付衣法道大播

清遠初謁演禪師師赴海會寺請命師典謁寒夜
孤坐撥爐見火一豆許輒然自喜曰深深撥有些
子平生事只如此閱傳燈語錄至破竈墮因緣大
悟自是隱居四面山大中菴次開法龍門道望尤
振

崔之道舒人為真源宮道士嘗見二仙人對奕與
一棋子令吞自此言休咎輒應後尸解

元宗善姓鍾元末指揮使從余闕守安慶及城陷披

緇潜之永隆山題句云目擊神州已陸沈心隨野
鶴與孤雲茫茫宦海羞容膝隱隱禪林可托身坐
假蒲團忘世慮卧投方丈掩忠精埋名拋棄人間
事懶問山河屬大明後得道為永隆開山祖

明朱橘望江人母夢吞星有娠十五月嘗憂焉遇道
人持物如橘謂其母曰食此子生矣問名氏示以
扇其上有麴君子三字旋不見即誕因名橘讀書
聰慧尤精於易數後臨池顧影有悟遂薄名利修

道忽遇道人持橘歌曰橘橘橘無人識惟有姓朱
人方知是端的橘聞便隨至郊外問其人非魏君
子乎不答泣請乃授以符訣令往皖山築室修煉
橘拜謝去修於皖公山後至惠州之博羅立化

明雪桐城楊氏子年二十薙髮九華山參雲門湛
然澄澄問之無對住七日有省忽一日聞鐘聲豁
然大悟乃入皖山住靜三載澄以衣鉢傳之

無心潛嶽永水菴僧年七十好笑如兒童狀逢人

募薪一束積至百擔自理之如陶穴然一日寄語
辭山下人曰無心以某日去人怪之及期乃入柴
穴中木魚聲不絕後自取火手自茶毘火光撲面
將木魚擲外口稱去了須臾而化其骨不僵至今
塔在小岑肖像如生

三貞姑宣德時人長姊嫁數年而孀遂結茅大凹
山中棲心禪寂二妹慕姊貞義相從清修後皆得
証道因於其地建三聖菴菴旁有石穴圓如鏡三

姑藏骸處也丁丑遭流寇婦女悉竄菴中寇至山下見緋衣三婦往來林莽間追至菴門見緋衣三姑像冠投刀相拜戒勿犯婦女得免至今春秋祀之

國朝性源結刹於大龍山之巔終日跌坐忽烈風雷電雨傾如注菴後數蛟騰起水深三尺沙彌皆驚怖莫措源入定自如蛟從屋角委折而下若不敢犯者人咸異之

元白姓鄧武岡州人謁顓愚為首座復往參憨山
博山天童諸老皆深器之順治丁亥至桐城入慧
山清泉寺兵燹之後煥成叢林法席大振後退居
舒之華蓋山

徽州府

漢方儲字聖公歙人講孟氏易精圖識善天文舉賢
良為洛陽令永元中郊祭問以陰晴勸帝毋往是
日晴詔責其欺儲曰咎時且至願乘輿亟還比駕

還雨電大作後傳其仙去廟祀之

晉羅文佑南昌人父塘與許遜學道晉太康中佑奉
母湛之歛採藥黃山結廬長春里丹成乘白狼去
人祠之稱呈坎天尊

唐許宣平歛人隱城陽山絕粒不食顏如四十許人
行及奔馬或題其詩於洛陽傳舍云隱居三十載
築室南山巔靜夜玩明月閒朝隱碧泉樵夫歌隴
上谷鳥戲崑前樂矣不知老都忘甲子年李白見

之曰仙人詩也乃游新安訪之不遇題詩其菴宣
平歸見之是冬野火燒菴不復知所在

慧明字元照歙人幼愚陋長乃神異民間疾疫醫
卜不起明與交臂即獲痊禱雨輒驗能使眇者視
跛者履人稱為聖僧

珠溪謙歙人得法於雲居道膺載傳燈錄

瀾大德歙人興唐寺僧性孤高杜荀鶴贈以詩

清素祁門人揚州刺史陶雅祈雨汪王廟夢汪王

曰師為水晶宮菩薩五龍行雨不由天降陶請之
師曰吾已遣雨揚州三晝夜矣果然

五代聶師道字宗微歛人少修道得服松脂法登績
溪百丈山採芝明月中聞天樂往南嶽訪蔡真人
遇一丈夫自稱謝修道與彭蔡偕隱已三百餘年
授以素書一卷歲餘還山號問政先生蟬蛻而逝
後人見之衡陽云從孫紹元世勤修煉後有四鶴
集屋光自空下如火而紹元化去

何令通休寧人賜號紫霞南唐國師精堪輿以言
牛頭山不利謫休寧一坐四十年大悟宋天禧正
席跌坐火從心出自燒而化

李玉琳婺源人遇真人授以玉皇經教真文雷雨
壞民居玉琳鐵誥所鎮獨無恙子孫皆世其術
胡得勝婺源人生而神異嘗曰某處覆舟某處失
火皆驗後有禱必應遺劍猶存

宋鄭仙姑歙人居烏聊山東嶽廟前數十年不出門

或有見之里外者蘇轍令績溪訪之問其年八十
矣猶處女也歸志其問答之語門有甘泉今名仙
姑井

元胡月潭婺源人事月蟾得天心五雷之祕飛步璿
璣之書治雷禱雨先知死期又黟有胡月澗術亦
如潭而殲邪治疫不用符咒忽夢登九天與徒言
訖而逝

明朝宗忍天童密雲悟法嗣住歙石耳山與都人酬

唱機緣甚多載在語錄

邈邈仙休寧人溽暑衣裘曝日中沍寒時裸體跣足而蹈冰雪不事浣濯近之無纖穢氣人稱邈邈仙年百餘歲坐化於齊雲山

慧融黟人隱石門洞時數日不食人夜經山中戴月而行訝朔晦何以得月尋之光從洞出叩其工夫盖月觀云

寧國府

晉竇子明名伯玉銍鄉人釣於旋溪得白魚腹中書
教以服食之法遂入黃山採五石脂服之三年龍
來迎去止陵陽山弟子安死葬石山下有黃鶴來
棲塚樹呼子安云唐人詩白龍已謝陵陽去黃鶴
還來喚子安

唐仲濬靈源寺僧有文名李白贈之以詩

清越敬亭僧工文張喬有贈詩

希運初住高安黃檗山曹溪六祖嫡孫大中三年

裴休知宣州迎居開元寺受法創廣教寺於敬亭
南麓

麻衣禪師中和間煉藥翠微峯下嘗衣麻衣有得
其麻縷者輒能療病

通公吳人結廬敬亭山北苦修敏悟叢林所推嚴
綬署宣州幕師事之

宋可勲有禪行作菴城山寺側曰卧雲太平興國名
對問曰卧雲深處不朝天因何至此勲曰天曉不

干鐘鼓事月明豈為夜人行因賜還山

宗杲少為惠雲寺苾芻宣和間參圓悟聞薰風自
南來殿閣生微涼語豁然悟主徑山法席緇流雲
聚稱臨濟重興孝宗聞其名召對稱旨賜號大慧
禪師

元賀士迪宣城人元妙觀道士善祈禱禦災成宗召
入京給車服從幸兩都賜號真人

張松谷隱芙蓉峯下嘗採藥療人病歲旱禱輒雨

大德庚子索筆書偈而逝

汪天驥涇人元妙觀道士能詩有暮春絕句云為
愛雲根綠錦苔柴門花落晝慵開竹窻讀罷南華
卷蝶夢蘧蘧枕上來

明法通字從石兩開堂於廣教註逍遙遊兼精於詩
如圭景德寺僧通大小乘止靜黃檗茆菴

大慧寧信寺僧掩關七年使寺衆以鍼刺體液出
皆乳未幾往峨眉至黃池勝果寺說偈而逝口中

火出自焚獨頂骨不壞

金碧峯有道行善天文棲敬亭石巖太祖幸其地
跌坐不起露刃臨之曰汝知有殺人將軍乎答曰
汝知有不懼死和尚乎異而謝之問以向導決勝
皆如其言

尹蓬頭寓宣陽觀嘗從道士索守犬作食道士囑
徒烹之徒竊食其兩耳尹食訖讓曰犬非全者因
吐出宛然惟缺兩耳歲餘辭去

國朝沈鼎彥字禹鉉南陵承天觀道士工詩善書尤精
修煉著黃庭直解

了然住千頃山振修黃檗道場能馴鹿狎虎冬夏
一衲康熙戊午卒年一百二十六歲今肉身不化

池州府

唐義安開元中居石埭杉山鎮國禪院有道行累詔
不起玄宗為割縣之三鄉租稅以贍衆僧

金地藏新羅國王子姓金氏名喬覺削髮為沙門

至德初渡海行脚至九華棲東巖石室土人服其
苦行築寺迎居之建中初刺史張巖奏請賜額化
城道場日盛貞元十年名衆告別俄山鳴石隕跌
坐而逝越三年啓龕入塔顏狀如生塔建寺右嘗
發光如火故謂之神光嶺後幕以殿四方頂禮不
絕

普願姓王氏新鄭人初六祖授南嶽讓讓授馬祖
而願則馬祖門下三大士之一貞元中憩錫秋浦

之南泉不下山三十餘年宗風大振太和八年示寂初偕願來秋浦者又有寶雲亦馬祖法嗣居魯祖山

趙知微九華山道士結廬鳳凰嶺前諷誦道書鍊志幽寂乾寧中屢詔不出賜碧雲星冠青霞羽衣以寵異之

五代西峯聖者楊吳時人陽狂不羈好吹笛能役鬼神蛟龍嘗寓池州乾明寺及去留笛後人寶之共

相傳玩

宋義懷本永嘉陳氏子天聖中嗣法雪竇七坐道場
化行海內晚年示寂於池之杉山

張先生舊志皆不詳其名政和間結廬齊山日惟
默坐人過問之直視不答在山三十年顏色轉少
後尸解

太平府

漢丁令威遼東人學道當塗靈墟山後化鶴歸遼

南北朝宋杯渡師西竺僧所至乘木杯渡水人因以稱之初以袈裟裹錫杖擲空隨所往卜勝地至繁昌隱靜山止焉宋元嘉初卒

螺浮尊者與杯渡同至姑孰卓錫山中泉自湧出今龍泉山福源寺中井是也汲以竹則清以綆則濁時又有方公禪師居青山日抱甕下汲供飲忽有虎跑擲院旁甘泉驟湧

宋趙自然繁昌人青華觀道士夜夢人嗽以柏枝及

覺神氣清爽遂絕烟火食又夢前人教以篆書寤
悉能記寫以示人皆不識嘗作原道歌言修煉之
要太宗召至闕親問之懇求還山卒及葬棺重不
可舉發之止存劍履

石風不知何許人紹興間寓當塗光孝寺披髮垢
面佯狂叵測人皆以石風呼之信口作詞初不可
曉後悉驗

婁僧失其名紹興中居當塗永寧菴一日留偈趺

逝有風在松梢月在天之句

廬州府

三國魏左慈字元放廬江人居天柱山能使鬼神坐
致行廚變化萬端曹操召見閉一室斷穀食期年
出之顏色如故欲殺之卒不可得

唐慧滿貞觀間結菴合肥大蜀山嘗誦法華經有白
衣來聽法自稱東海龍王少子也是時苦旱師令
降雨答曰盜布天澤當殛死師曰汝舍此身以救

民我誦此經以度汝言畢不見須臾膏澤滂沱越三日有龍死山陽師收葬之民為立祠遇水旱祈必驗

三刀禪師唐末居廬江顯寧院黃巢之亂賊執而斫之三刀無血故名

崔自然巢縣人少學道得服松脂法隱城南洞中冬雪常於溪中澡浴入山虎豹皆馴伏一日告逝後有人見之豫章道上其石牀藥臼見存

元妙果饒之樂平人嘗遊四明天童浮梁諸山歸息
於巢豫建一塔是夜有光如匹練自天際散於五
峯之頂彌三夕乃止

明吳崇信無為道士嘗遊長沙傳毛真人雷法能驅
役鬼神祈禱甚驗

國朝星郎龍溪林氏子也舉天啓丁卯鄉試仕屯田郎
出守肇慶棄官薙髮徧歷名山後至廬江住治父
山祖庭寺江畔有古樸一株枯而復榮者數矣師

至樹復茂康熙癸丑樹忽萎師曰樹倒老僧行矣
沐浴更衣而逝

鳳陽府

隋方唐虎窟寺僧持律甚嚴每行有虎隨之郡守因
以名寺今定遠縣禪窟寺是也

唐藍采和唐末居濠衣襴衫綠袴黑木腰帶一足靴
一足跣夏服絮冬卧雪出氣如蒸自號藍采和嘗
歌踏踏歌時曳長繩拖錢以行錢散不收至今濠

州有撒錢街

道樹卜壽州三峯山結茅而居言笑詭異常化佛
羅漢形學徒睹之莫能測寶歷元年九十歲無疾
而終

道雄真如寺僧冬夏惟一破衲蓬頭跣足每施藥
濟人即獲奇效不受謝廣修橋路人多便之又旁
通韻學反切精致年七十八趺坐而化

宋志言壽州人許姓落髮東京景德寺貌奇古能前

知仁宗嗣未立默遣內侍詢之乃書十三郎字上
不解後英宗以濮王第十三子入繼

明木牌王自言王姓能治療手持木牌人因以稱之
嘗在懷遠冬月宿元真寺赤地門外雪深尺餘其
卧處如燎火有問病者命持酒來一飲而盡吐其
半飲病人即愈後不知所之

國朝海華號藏林宿州淝水人嘗參古德於花山戒律
精嚴人推為當代慧遠後住古林菴一時陳旻昭

周蓮池黃石公諸名流悉向往焉

潁州府

漢周義山字季道汝陰人丞相勃之後也父祕陳留
刺史義山年十六常於平旦日出時東向服氣嗽
咽百數父問之對曰愛此朝日之暉是以服之後
遇中嶽仙人蘇子元授以長生之道白日昇舉

隋張路斯潁上百社人隋初明經登第為宣城令夫
人關州石氏生九子罷令歸每夕出還則體常冷

且濕石氏異而詢之曰吾龍也夢人鄭祥遠亦龍也騎白牛據吾池吾屢與戰未勝明日取決可令吾子挾弓矢射之繫鬣以青綃者鄭也絳綃者吾也子遂射中青綃鄭怒東北去投合肥西山死由是張與九子俱復為龍事見歐陽修集古錄目跋後蘇軾迎祀潁之西湖有昭靈張龍公祠記

宋丁少微亳州人為道士持齋戒奉科儀尤為精至嘗隱華山潼谷密邇陳搏所居與搏齊名志尚清

潔善服氣多餌藥年百餘歲太平興國三年召赴闕以金丹巨勝南芝元芝為獻還山七年冬卒

明張古山潁州人生而端重父母欲為娶妻不從入迎祥觀為道士久之名為武當山提點能言未形事後入山採藥不知所終相傳張三丰遊潁古山師事之遂得其術今迎祥觀有混元衣體製特異或云三丰所留也

潁州

唐覺禪師西洛人受業藥山院得法于汾州嘗住滁州瑯琊山開化寺有五百梵僧寓席下休夏同日而來同日而去

宋王中勤來安人淳熙中為道正戒行峻潔遇異人授祕法每歲旱及疾疫有禱立應

明德清字澄印全椒人族姓蔡氏年十二入南京報恩寺事無極法師內江趙貞吉摩其頂曰兒他日人天師也後駐錫曹溪宗風大振海內稱憨山大

師天啓三年示寂

和州

唐商棲霞歷陽人大歷中棲白石山彭仙洞善吐納
之術絕粒三十餘年

惠褒結茅舍山縣北山麓時人重其道行因名其
山曰褒禪宋淳化中禱雨有應賜號護法大師

宋紹隆歷陽人得法於圓悟悟目之為瞋睡虎由和
州開聖寺至平江虎邱說法大闡臨濟宗旨法嗣

最盛

白玉蟾福州人本姓葛名長庚遇異人傳祕術世
以為仙嘉定末詔徵赴闕奏對稱旨嘗憩舍山白
石洞愛其泉石清幽特再過之有重游詩見集中
元圓寂號懶牛和尚至正中寓和州既說偈已即沿
麓至磯舉步大江如履平地徐至中流乃跣趺而
坐浮水上久之方沒後半月出沙洲上衣履不脫
跌坐儼然如生衆人聚觀乃輿歸茶毘焉廉訪幹

克莊有記

廣德州

宋契嵩多智慧能徹禪家宗旨崇寧中賜名曰明教
嵩禪師并賜寺額曰明教禪寺明太祖題橫山詩
有曰上有禪師悟透關

元王當陽初遇異人能幻化之術後遊武當山歸於
郡南平頂山建昇平道院修煉其中撰精語後端
坐而化

明孔師居白鶴觀道士嘗遇異人授以祕籙能呼吸
風雲驅役鬼神禁蛟名鶴斬魅禳星年八十尸解
仙去

六安州

宋明本錢塘人皇慶壬子自天目山遊至六安齊頭
山居水晶菴所著有中峯語錄青山白雲吟山居
十詠為世所稱


明金印英山人世宗病癰陶仲文薦印治之印書符

傳患處中官見有白蛇擁上躬遂愈授博士賜名
中剛賜坊曰盡職供事後承命治江西疫陞太常
寺卿賜一品服

泗州

唐僧伽本西域人唐龍朔中南游江淮欲於泗州建
寺賀元濟請捨所居為之僧伽曰此舊佛寺也掘
地得古碑乃齊香積寺銘并獲金像一軀伽曰普
照王佛也視石刻果然景龍二年中宗遣使召見

賜號國師賜寺名普光王寺四年三月坐化於長
安大薦福寺壽八十有三宋大中祥符六年加號
普照明覺大師



江南通志卷一百七十五